



ISLAMISCHE GEMEINSCHAFT DER BOSNIAKEN IN DEUTSCHLAND

Islamska zajednica Bošnjaka u Njemačkoj

IZBORNA PRAVILA ZA ORGANE DŽEMATA IZBNJ

Usvojena na redovnoj sjednici Skupštine IZBNj održanoj u Koblenzu 12.10.2024. godine



Član 1.

Predmet pravilnika

Ovim se Pravilnikom uređuje proces izbora za članove džematskih odbora u džematima Islamske zajednice Bošnjaka u Njemačkoj. Izbori za džematski odbor se temelje na odredbama okvirnog Statuta i Izbornih pravila IZBNJ i Ustava IZ-e u BiH.

Član 2.

Biračko pravo

Pravo da bira ima svaki član džemata koji je napunio 18. godina, koji redovno i na vrijeme plaća članarinu, te nije u prekidu i zaostatku sa neplaćenom članarinom.

Član 3.

Izborna komisija

Izbore u džematu organizira džematski odbor sazivanjem Izborne skupštine džemata, a sprovodi Izborna komisija. Izborna komisija je tijelo sastavljeno od najmanje tri člana džemata, koje imenuje Skupština džemata na dan izbora. Mandat Izborne komisije prestaje nakon što ista sprovede izbore za organe džemata.

Član 4.

Izborna skupština

Izborna skupština se održava svake četiri godine.

Izbornu skupštinu džemata saziva aktuelni džematski odbor 14 dana prije izbora pisanim pozivom potpisanim od predsjednika ili zamjenika predsjednika i imama. Poziv je potrebno postaviti i na oglasnu tablu džemata.

Skupština bira slijedeće organe džemata:

- džematski odbor (Vorstand) od najmanje četiri člana (predsjednika, potpredsjednika, blagajnika i sekretara)
- tri revizora predviđena statutom džemata
- dva člana nadzornog vijeća iz džemata
- člana Skupštine Islamske zajednice Bošnjaka u Njemačkoj



Imam džemata je po polažaju član džematskog odbora i ne bira se. Njega na tu poziciju imenuje Reisul-ulema posebnim dekretom o postavljenju.

Član 5.

Proces izbora

Izbor članova džematskog odbora, koji su članovi odbora u smislu § 26 BGB (predsjednik, potpredsjednik, sekretar i blagajnik) vrši se na osnovu kandidacionih listi za svaku od navedenih pozicija zasebno. Kandidati koji kandidiraju za poziciju predsjednika, potpredsjednika, sekretara ili blagajnika mogu biti kandidati samo za jednu od tih pozicija. Jedan član ne može biti istodobno kandidat za više pozicija.

Ostali članovi džematskog odbora (npr. član odbora za rad sa omladinom ili ženama, član odbora za održavanje vakufskih prostorija i sl.) biraju se shodno potrebama džemata. O broju ostalih članova džematskog odbora odlučuje džematska skupština.

Član 06.

Uslovi za kandidate

Kandidat za člana džematskog odbora treba da je redovan član džemata najmanje tri godine. Svi članovi džematskog odbora praksi i radu džemata provode i poštuju izvore islama - Kur'an i Sunnet, duhovnu hijerarhiju (Reisul-ulema – Muftija – Glavni imam – Imam), hanefijski mezheb, maturidijski akidu i islamsku tradiciju Bošnjaka.

Svaki kandidat za poziciju člana džematskog odbora shodno §26 BGB treba biti član nekog od džemata najmanje 5 godina, treba dostavi kratku biografiju i potpisati izjavu o nekažnjavanju.

Kandidati za člana džematskog odbora, nadzornog vijeća i revizori ne mogu biti birani na te pozicije, ukoliko obavljaju dužnosti u drugim udruženjima, osim u organima IZBNj i IZ-e BiH.

Član 07.

Dužnosti izborne komisije

Izborna komisija je nadležna za verifikaciju kandidata i sačinjavanje glasačkih listića.



Izborna komisija je dužna odbiti kandidaturu osoba za koje se utvrdi da ne ispunjavaju uvjete za izbor u organe džemata.

Član 08.

Način glasanja

Glasanje se provodi putem glasačkih listića.

Na glasačkim listićima, glasač zaokružuje samo po jednog od kandidata za pozicije shodno §26 BGB (predsjednik, potpredsjednik, sekretar i blagajnik), za članove nadzornog vijeća po dva i revizore po tri. Za ostale članove džematskog odbora, glasač zaokružuje onoliki broj kandidata koliko je Skupština odredila da se bira dodatno u odbor shodno Članu 5.

Glasački listići na kojima nije izvršeno zaokruživanje prilikom glasanja u skladu sa prethodnim članom, ili na kojima je vršeno prepravljavanje, dopisivanje ili potpisivanje smatraće se nevažećim

Pri predaji glasačkih listića za glasanje, Izborna komisija će zaokružiti redni broj glasača u biračkom spisku naznačavajući da je pristupio glasanju.

Član 09.

Rezultati izbora

Izborna komisija pristupa utvrđivanju rezultata izbora odmah po prijemu izbornog materijala.

Član 10.

Zapisnik o sprovedenim izborima

O toku glasanja Izborna komisija vodi zapisnik u koji se unose sve činjenice važne za ocjenu pravilnosti izbora.

Zapisnik potpisuju članovi Izborne komisije.

Član 11.

Izmjene i dopune

Izmjene i dopune izbornih pravila vrše se na način i po proceduri njihovog donošenja.



Prijedlog o promjeni i dopuni pojedinih odredbi ovog pravilnika može podnijeti Izvršni odbor Islamske zajednice Bošnjaka u Njemačkoj, a potvrđuje ga Skupština Islamske zajednice Bošnjaka u Njemačkoj. Izborna pravila tumači Izvršni odbor Islamske zajednice Bošnjaka u Njemačkoj.

Član 12.

Završne odredbe

Svaki član džematskog odbora dužan je potpisati izjavu kojom potvrđuje da će poštivati normativne akte Islamske zajednice Bošnjaka u Njemačkoj.

Izjava je sastavni dio ovog dokumenta.

Na konstituirajućoj sjednici svaki član džematskog odbora dužan je dati prisegu, prilikom koje će držati svoju desnu ruku na Časnom Kur'anu.

Tekst prisege je sastavni dio ovog dokumenta.

Član 13.

Stupanje na snagu

Izborna pravila su usvojena na Skupštini dana 24.05.2010. godine. Ova Izborna pravila dopunjena su na Skupštini 09.06.2014. godine i usklađena sa standardiziranim džematskim statutom na sjednici Skupštine 12.10.2024. g.



Izjava

Ja _____, rođen _____
u _____ sa mjestom stanovanja _____
_____ izabran na poziciju _____ u džematskom
odboru džemata _____ bez ičije prisile i pod punom
moralnom odgovornošću potpisujem ovu izjavu kojom izjavljujem da ću poštivati izvore islama
Kur'an i Sunnet, duhovnu hijerarhiju (Reisul-ulema – Muftija – Glavni imam – Imam), hanefijski
mezheb, maturidijski akidu i islamsku tradiciju Bošnjaka, kao i normativne akte Islamske zajednice
Bošnjaka u Njemačkoj.

Datum: _____

Mjesto: _____ Potpis: _____



PRISEGA

"Ja _____ se kunem Svemogućim Bogom da ću dok budem član ovog džematskog odbora služiti vjeri islamu i raditi za dobrobit džemata. Bože, od Tebe pomoć molim i razboritost tražim."